

HEBREOS

Yi Necy Huidi Pinjaty Yajniguejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax mïd je yprofetas ajcxy, je' ajcxy huidibi najtzcapxïy Dios y'ayuc. ² E jadachambi ma xï tiempo yhuingooni co je naaxhuiñybi ycixani, Dios ayuc yecy ma ïch ajt mïd je' y'ung. Dios mïd y'ung yaj'oyïy je naaxhuiñybi etz tög'óciy tijaty huidibi yajpatp. E Dios ti y'ung yajmigo'ixmadziydäy tög'óciy. ³ Dios y'ung ymïd Dios y'oy'ájtïn, yi' je' Dios ytïcxïn'ajtpy yjajïn'ajtpy. Yi' je' codinaayb etz yajniguëxïgy nej je' je Dios. Dios y'ung huijtz'ijtaayb tög'óciy mïd je' y'ayuc etz ane'mïn mic'ajt mïdpi. Co Dios y'ung ti xyajhuaatzim ajt nbocy, chi cöbijcy je mij'ane'mïn jïby tzajpjoty, jadu'n nej jihuïy y'ixtacy a'oy'amy ma je mijpi Dios ymïc jïby tzajpjoty.

Dios y'ung jacmij yi'ca'ydi ángeles ajcxy

⁴ Je Dios y'ung jac mij je' ymic'ajt y'ane'mïn mïdity, ca'ydi je ángeles ajcxy. Com yi' je' Dios y'ung, paady ycixpi mic'ajt mïdity jaydëbi ane'my huidibi Dios yje'ajtpy, e ca'ydi yi' ángeles ajcxy yi' jadu'mbi mic'ajt mïd. ⁵ Com Dios ca' yi' ni tög ángel nimay:

ïch miich n'ung'ajtpy. ïch miich ti nyajpi'c'aty jadachambi xï.

Nañ jadu'n ca' Dios ni tög ángel nimay:

Miich xyteedy'adïbich, ïch miich n'ung'adïyb.

6 Co Dios y'ungoob oy quexy ma naaxhuiñjyáy chinäy, chi yí' ane'mín pídacý:

Huen je ángeles ajcxy nidüg'óciy huindzigíhuipy pa'tjihuíhuipy je' y'ung.

7 E mîd je ángeles ycixpi, Dios ymîna'ñ:

Yí ángeles jadu'n yí' ajcxy nej poj. Yí' ajcxy huídibi tzajpjoty tzînaayb, jadu'n yí'ajcxy nej huídizuc, nej jînye'n.

8 Jadu'n Dios ymînañ mîd y'ung ycixpi:

Miich, Dios'ajtp, miich m'ane'mín huinixî huinîtiempo yí' y'idipy. Mîd mdudägy'ajtin miich m'ane'mîpy.

9 Tî mdzocy je tîy'ajt tîybi, e ca' tî m'ixa'ñ je jîbicipi. Paady ycixpi Dios, miich mDios, tî xyhuin'ixy, e tî yejctây nîgi ma miich je jotcujc'ajtin je xondaacín, ca'ydi ma yí mmi'ane'mbidijc.

10 Dios nañ jadu'n ymîna'ñ:

Miich, Huindzín Dios, oga'n'aty mbidac nej naaxhuiñybi chondacy, e mîd miich mmic'ajt myaj'oyîy je tzajp.

11 Cijxtâhuip yí naaxhuiñybi etz yí tzajp, per miich huí'mîp huinixî huinîtiempo. Jadu'n yí naaxhuiñybi etz yí tzajp y'amijîydâhuipy nej huit.

12 Jadu'n miich yí naaxhuiñybi etz yí tzajp m'anëgîpy nej tûg huit yaj'anëgyín. Jadu'n miich yí naaxhuiñybi etz yí tzajp myajtigadzîpy nej jäy ajcxy yajtigach yhuit. Chi miich je'nî m'idipy, je mxî mîmîjt ni mîna ycacixîpy ycatigoyîpy.

13 Ni camîna Dios canîmay ni tûg je ángeles ajcxy:

fña' ma ñch nmijc a'oy'amy, ixti mabaad ñch miich je mmidzip nmimadactäyich, jadu'n y'ajcxy nipaadipy nej y'i' miich mdecypocx-pejt'adyii.

¹⁴ Tüg'óciy je ángeles ajcxy ac espíritu y'i' ajcxy, e ytungixy ma Dios, yquexyöygiy jígix pubedipy je jäy ajcxy huidibi ajcxy y'alma padam ñidzoocin.

2

Ca' n'ijxnajx nmidonajxim nigoo yi pocyhuin-meecxin

¹ Miid jadyaabi tiy'ajt ycixpi, oy co yajxon n'ocjäyugüiyim Dios ytiy'ajt huidibi ti nmidoohuim, jigix ca' nijjpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miid ypocy ycixpi. ³ ¿Nej tijy ñch ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnidzoocim ajt n'alma. E jac'axam je discípulos ajcxy nañ jadu'n najtzcapxiy Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ñch ajt. ⁴ Jadu'n anajty capxhuäcxixy Jesús y'ayuc ma ñch ajt, chi Dios yajniguëxiçp Jesús y'ayuc co yjanchity co tuñ ijxpejt, miñhuinma'ñ etz milagro. E co Dios xymooyim je yjihu'i'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej y'i' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi ángeles ajcxy ti cötuycin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ich ajt nnimiydaacim. ⁶ Hue' janchtiy ji tüg'it yjaybetyity ma Dios ñecy, ma ymina'ñ:

Miich Dios, ¿ti yi' je naaxhuiñjyä, co miich yi' ajcxy mjäy medziyb? ¿Ti yi' je naaxhuiñjyä, co miich je' ajcxy mjotmay'adyii?

⁷ Janch con xii tiempo miich ti mmöy yi' naaxhuiñjyä ajcxy e nañ ti mmöy jacminacy ymic'ajt y'ane'm'ajt ca'ydi yi ángeles ajcxy. Per jac'axam miich mmöhua'ñ naaxhuiñjyä ajcxy nigä ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactähuiy yi' ma yi' naaxhuiñjyä ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuiy tüg'óciy tijaty huidibi ti myaj'oyiy, y'idipy ma yi' ajcxy ytecpa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ixim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ixim co Jesús mäd mij'ajt ane'm'ajt. Je ángeles ajcxy nigä mic'ajt oy'ajt anajty mäditý, ca'ydi Jesús co yi' chinay ya naaxhuiñ. Jadu'n Dios tuñ jaydebí Jesús y'ögy mäd jäy ajcxy ypocy ycixpi. Jadachambi Dios ti

möy Jesús mij oy'ajtín, etz mij ooy ti cömay miid je tzaachy'o'cín huídibi ypaat.

¹⁰ Tüg'óciy huídijaty ya yajpatp, ji'ajtp yí' miid Dios ycixpi etz Dios ymic'ajt yaj'ijtaayb tüg'óciy huídibi ji'ajtp. Dios tudägy ytuuñ co yajca'pxi Jesucristo y'oy'ajtín miid je tzaachypí huídibi ti minaxy ti yajnaxy. Miid co Jesucristo tzaachypí ti minaxy ti yajnaxy, paady ycixp jäy ajcxy padaangixy Cristo y'oy'ajtín. ¹¹ Miid co Jesucristo, je huídibi jäy ajcxy yajpocyñihuaatzp, jiiyby mic'ajt ti paady ma Dios Teedy, paady ycixp yí' ajcxy huídibi patcixp pocyñihuaatzín nañ jim mic'ajt patcixy ma Dios Teedy. E miid co Jesucristo etz yí' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuüy co yí' ymína'ñ co je mibijcpídiyc jadu'n nipaady nej yí' yjugytijc ymigügtijc. ¹² Paady je Cristo ymína'ñ ma yjaybetyity:

Miich Dios, iich miich ngapxpadipyich ma nmigügtijcich. N'iihuipyich iy miid miich ycixpi ma je jäy ajcxy ti nayoöymújcigixy.

¹³ Nañ jadu'n Cristo ymína'ñ ma yjaybetyity:

Nmijpidägiyich Dios.

E jadüg'oc ymínaanip:

Cha iich, miid je ung anäg ajcxy tiibi Dios xymöyich.

¹⁴ Ma jäy ajcxy ytügquëx'ajtcixy, tügpí yxiixy, tügpí ni'py je' ajcxy. Nañ jadu'n Jesús ymiid je' anajty yxiixy ñi'py jadu'n nej jäy ajcxy ymiidity jigix jébi y'ögy, e jadu'n je' yajhuindigoydáhuipy je huídibi anajty jamic'ajtmíid co jäy yaj'ögiiyb, je' je' je mujcu'. ¹⁵ E jadu'n je Cristo yajnihuädzictuty

tüg'óciy pinjaty anajty cojuyi'y codoogüy y'ijtp ma je mujcu', miið co tzigüygixy yi' y'o'cin. ¹⁶ Janch co Jesús ymiiñ ya naaxhuiñ, ca' nmínaaním co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E miið jada ycixpi, Jesucristo jadu'n anajty miiðity ñinícx etz yjugy'ajtin tú'ciy miið je jugytiyc ymígügtiyc ninícx etz jugy'ajtin, jigix jëbi yi' naydügpajc codináy naaxhuiñyjáy ajcxy ma Dios yhuinduu miið tudägy'ajt etz pa'ayoohuin. Etz nañ jadu'n jigix jëbi huindzigüy Dios miið yci'm ñinícx miið jäy ajcxy ypocy ycixpi, e jadu'n ya-jpocyhuaatztähuip yi' mayjäy ajcxy. ¹⁸ Com Jesucristo ci'm tzaachypi minajx yajnax, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jëbi pubety pinjaty jadu'n tzaachypi minajxp yajnaxp, etz ma yjot'ixyii yhuinma'ñ'ixyii je mujcu'.

3

Jesús jacnigi mijity yi' ca'ydi Moisés

¹ Miið co Jesucristo jadu'n ti tuñ, paady ycixp miich ajcxy migügtiyc huidibi cixyjot huiniñot mijpidacp Jesucristo, je huidibi ajcxy Dios ti xyhuin'ijxcixy co xyje'adánigixy. Pidaaccix mhuinma'ñ yajxon ma je Cristo Jesús, je huidibi nejhuüyím co Dios ti quexy ya naaxhuiñ, je huidibi tügpajc mijtungmiið ma Dios, huidibi tügpajc xycodinaayím ma Dios. ² Jesús tudägy yi' ti y'ity ma Dios yhuinduu, je Dios huidibi ti yajnibigyii je mijtung, tim jadu'n nej Moisés y'ijty tudägy ma je ytung miið tüg'óciy jäy huidibi anajty ti cöbijccixy Dios ycötujcín ma Moisés. ³ Jesús

ymihuaad niigi huindzigi'ñ etz cömayin, ca'ydi Moisés. Tim jadu'n nej pin tüg tijccojpí je' je' ijtp cömay, ca' nminaanim je tijc ijtp cömay. ⁴ Tüg tüg tijc jim je' pin cojp. Per Dios yi' ti yajcojtäy yaj'oyiydäy tüg'óciy huídibi ji'ajtp. ⁵ E jadu'n je Moisés tudägy je' ytuuñ mïid tüg'óciy jäy huídibi ti paady Dios ycötujcin ma yi'. Je Moisés je' ytung'ajti yejcy je tiy'ajt huídibi anajty Dios jac'axam yegamyb. ⁶ Je Cristo tudägy ytuñ mïid tüg'óciy ñich ajt huídibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n ñich ajt nbaady nej Dios ytijc, e Cristo tudägy ytuñ mïid ñich ajt, pen tudägy nmibijcin Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotcujc ixti mabaad n'o'cim mïid je' ycixpi huídibi njijp'ijxim ma Dios.

Dios yjäy ajcxy ypooxin

⁷ Paady ycixp jadu'n yjaybetyity ma Dios ñecy ma je Espiritu Santo jadu'n yminañ:

Jadachambi pen mïdooyb miich ajcxy nej Dios yminañ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huídibi mibidigy Dios jecy'ajt (co ajcxy y'ijty jim mijtigiduum). Je xi je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios yminañ:

Miich ajcxy mmij'ap mmijteedy ajcxy jim mijtigiduum xyjot'ijx xyhuinma'ñ'ijxich ajcxy jecy'ajty. Ca' ajcxy jäymech co ajcxy y'ijxy anajty canaag mijhuinma'ñ huídibi

ndumybiich anajty m̄id yi' ajcxy ycixpi huixchiguïpx j̄imijt.

10 Paady njotma'tyich m̄id miich ajcxy mmij'ap mmijteedy jecy'ajty, e nm̄inaañich: "N̄idigoy t̄udigoy ajcxy jabom jabom ma yjot yhuinma'ñ. E ca' ajcxy nejhuñhuaangixy anajty ñch n̄ñ'aa ndü'aa."

11 Paady yi' ajcxy nm̄ijotma'tyich, e janch janch n̄ñmaayich ajcxy, e ca' n̄ñdägyich, co ca' ajcxy ytiñhuipy ma ñch nbocxtac.

12 Migügtjc, naygüend'ájtigix nidüg nidüg co ni t̄üg miich ajcxy mgam̄id'adip j̄ibicjot j̄ibic-huinma'ñ, e ni m̄ga'ixm̄ájtzcixipy Dios juugypi y'ayuc, m̄id co ca' mm̄ibijccixy. 13 Hue' janchtiy nayjot'am̄ijm̄óoyigixy miñ xyipy jabom jabom nam̄i x̄i tiempo yjacñicxñi. Jadu'n miich ajcxy mdunipy, ca'ydi ajcxy yi pocyun̄i xyhuin'ñngixy, e chi anajty mnaybidáacigixy jotjuuñ. 14 Pen nm̄ibijcim nm̄ijpidaacim Cristo y'ayuc t̄ibi nbaatim oga'n'aty, e ca' n̄ixtiñhua'cim mabaad n'o'cim, chi j̄ebi n̄'ijtim m̄id Cristo.

15 Je' je' je huidibi jaybetyity ma Dios y'ayuc: Cham, pen mm̄idooyb miich ajcxy nej Dios ym̄ina'ñ, ca' ajcxy m'ijtcixy jotjuuñ, jadu'n nej je' anajty ajcxy huidibi Dios mijotma'tp anajty m̄id co ajcxy m̄ibid̄igy Dios.

16 ¿Pinjaty ajcxy huidibi jecy'ajty midou Dios y'ayuc e m̄ibid̄igy Dios? Nidüg'óc̄iy je' ajcxy huidibi tzomb Egipto naaxjot jecy'ajty m̄id Moisés. 17 ¿Pinjaty je Dios ym̄ijotma't jadu'n huixchiguïpx j̄imijt? Je huidijaty ajcxy tundigoy m̄id Dios ytiy'ajt, e je' ajcxy cijx y'öctaaygixy

jim mijtigiduum. ¹⁸ ¿Pinjaty Dios ñimay co ni camina ytigihuiipy ma je Dios y'it ylugar ma jëbi ypooxcixy mïid yí? Je' ajcxy huidibi ca' ycapxymïdoy. ¹⁹ Paady nnejhuïyim co janch ca' ajcxy jajty nej ytigïygixyipy ma Dios y'it ylugar mïid co ajcxy ca' mibijcy Dios y'ayuc.

4

¹ Com nmïidni ajt Dios y'ayuc, jadu'n nej ti xyaj'ahuanïyim co ndigïyim ma yí' chinaydac yjugy'ajttac, e nboocxim mïid yí'. Paady ooy tzocy co ndzigïyim Dios. Ca' jecyity co nidüg miich ajcxy ca' mdigihuiipy mïid co ca' mmibijccixy Dios y'ayuc.

² Nañ jadu'n ti ñich ajt nmïdoohuim je Dios y'ayuc oybi, tim jadu'n nej yí' ajcxy jecy'ajty ti mïdooy. Per ca' Dios y'ayuc ma ti ypubedyii ajcxy co ti jamïdoogixy je tiy'ajt. Com hue' ajcxy ymïdou, e ca' ajcxy mijpidacy. ³ ñich ajt com ti nmibijcim je Dios y'ayuc oybi, ñich ajt je' tigïyimip ma je it huidibi Dios ti tijy ma jëbi nboocxim mïid yí'. Com Dios jadu'n ymïnañ:

Paady yí' ajcxy nmïjotma'tyich, e nnimäyich ajcxy, n'ïbaadyich ngapxpaadyich n'ayuc, co ni camina xï yí' ajcxy ypocxtac capaadiipy ma ñich.

Tüg'ócïy huidibi Dios yajcojy yaj'oyïy, hue' ti yajcojy ti yaj'oyïy jayïjpnï ca'ni anajty naaxhuiñybi chondacy. ⁴ Com ma yjaybetyity je tiy'ajt jiiiby muumity nigapxy je mïhuixtujcxïbi ma jadu'n ymïnañ:

Dios ypooxcy je mïhuixtujcxïbi mïid je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n yminañ:

Ca'p yi' ajcxy ytigíygyixipy ma ich nbocxtac.

⁶ Hue' janchtiy Dios yjacmíid'ajtyñi it lugar ma ypocxtac ma jëbi pinjaty ytigihui. Yi' ajcxy huídibi tzinay jecy'ajty huídibi jayip midou Dios y'ayuc, ca' je' ajcxy ytigíy ma Dios ypocxtac, míid co ajcxy capxycómíidoodacy Dios. ⁷ Paady ycixpi Dios ti pidägy tüg xii tüg tiempo mina jëbi pinjaty tighuipy ma yi' ypocxtac. Je' jadachambi xii tiempo Dios ti pidägy. Dios ti xyñimaayim nej David yminañ tzach com jecy, nej miñ jaybety huídibi ti yajni-gapxy co jadu'n yminañ:

Jadachambi pen midooyb miich ajcxy nej Dios yminañ, ca' ajcxy mnyabidáacigixy jotjuuñ.

⁸ Co Josué je Israel jäy ajcxy camoy je pocxin, ca' Dios canigapxy huingbi xii mina ytigihuañ ajcxy ma Dios ypocxtac. ⁹ Paady ycixp, jadu'n yjac-hu'myñi jadüg xii tiempo mina Dios yjäy ytigihuañ ma Dios ypocxtac. ¹⁰ Com pinjaty tigíy ma Dios ypocxtac hue' je' ypocxy míid je' ytung ycixpi tibi anajty tuñ, tim jadu'n nej Dios ypocxy je mihuixtujcxibi míid je' ytung ycixpi tibi anajty tuñ. ¹¹ Hue' tzocy co naymic'ixim nej huaad ndigíyim ma je Dios ypocxtac, ca' yjecyity co nijëjity miich ajcxy mbaduunipy nej ajcxy y'idich huídibi ajcxy ca' mibijcy Dios y'ayuc, e ca' mdigíygyixipy ma Dios ypocxtac.

¹² Com yi' Dios y'ayuc ijtp yi' huinixii huinitempo, e ymíid mic'ajt. Nigi yajtigiyñajxtäy ninicx, jot almi, ca'ydi tüg espada huídibi mejtz'adu'm'amy jipip etz yjipxuñity. E Dios

y'ayuc nejhuiydaayb nej jäy ajcxy yjot yhuinma'ñ mïidity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'ñ nmïidity ñiguëxictähuiþ yi' ma Dios, je Dios ma ñich ajt nguendi ngïyegaanim, yi' ijxtaayb ajt njot nhuinma'ñ.

Jesús yi' je' je mïhuingapxpï ma Dios

¹⁴ Jesús, je Dios y'ung, yi' je' tügpajc jacmïitungmïid huidibi xycodinaayim ma Dios mïid ajt nbocy ycixpi. E Jesús ti ytigïy ma Dios yhuinduu, paady ycixp tzoc ijtim tudägy ma ajt nmïbijcin. ¹⁵ Pues com Jesucristo, je huidibi tügpajc mïitungmïidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej ñich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcuyc nmïhuingoonim je Dios y'ane'mdac e n'ojadajtim nmïbijctzoohuim Dios, jaydëbi co anajty jotmay mïid'ajtim, chi Dios may'ajt oy'ajt tunipy mïid ñich ajt ycixpi.

5

¹ Tüg tüg mïitungmïidpi huidibi huingapxp jäy ajcxy ma Dios, hue' je' yajhuin'ijxp ma yëydïctijc, etz yajnïgapxpejty, jaydëbi yhuingapx jäy ajcxy ma Dios etz yajnaxipy Dioscojuyip mïid jäy ajcxy ma Dios, etz yegipy huindzigi'ñ ma Dios mïid jäy ajcxy ypocy ycixpi. ² Je mïitungmïidpi jäy ajcxy yajnïbijc huidibi huingapxp jäy ajcxy ma Dios, jëbi yi' ajcxy

pa'ayooy huenpinity huídibi pocy ymíid, com nañ jadu'n yí' ajcxy pocy jihuïy. ³ E míid yci'mbocy ycixpi copicy yegipy huindzigí'ñ ma Dios etz míid jacjadyii jáy ajcxy ypocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yí' míid jáy ajcxy ycixpi, tim jadu'n nej Dios huin'ijxy Aaron jecy'ajty etz yajnibijcy yí' jadu'mbi tung. ⁵ Jadu'n yjajty míid je Cristo, ca' ci'm nayñibijctzoohuïy ma yí' jadu'mbi tung. Dios yajnibijci co huingapxip míid jáy ajcxy ycixpi, e ti ymöyii je mij'ajt jadu'n nej anajty ti nimáy:

Miich je' ich n'ung. Ich miich mjugy'ajt ti mmöy cham.

⁶ Nañ jadu'n ymina'ñ jadüg'it ma Dios ñecy:

Miich je' mhuingapxyp je jáy ajcxy ma Dios huinixi huinitempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydágy minucxtägy Dios, chi ooy mibijctzoy janch mic je Dios huídibi jébi ycohua'ñyii ma je o'cin. Míid co ooy mibijcy ooy huindzigíy Dios míid yung naxy yjot yhuinma'ñ, paady Dios ymidoohui.

⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, míid je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yí' y'oy'ajtin míid je tzaachypi huídibi yminajxy yajnajxy, chi ni'ixi' anajty y'ity jébi cop'adyii alma nízzoocin huinixi, jaydébi tüg'óciy pinjaty capxymidoob Cristo, ypaadip ajcxy y'alma nízzoocin. ¹⁰ Dios jadu'n yajnibijcy Jesús co yajnicxip je jac mijpi tung ma yí' co huingapxip jáy

ajcxy ma Dios, tim jadu'n nej Melquisedec ytuñ jecy'ajty.

Je ayo'n co njijpyöyduutim yi mibijcin

¹¹ Ooy ñch miich ajcxy mij nmüdmüydägañ ma jadayaabi tiy'ajt, per ooy chachchip nimüydaacñity, com ca' miich ajcxy mic'amy mhuiñijihuñuipy Dios ytiy'ajt. ¹² Jadu'n nej jada xii tiempo ti yjeñi ma miich ajcxy oga'n ti mmibicy. Hue' miich ixypy ajcxy mniyaj'ixpiñip Jesucristo ytiy'ajt je tzipjatypi. Per miich ajcxy mdzojcyñi co myajnajtzcaxihuipy huiñemy je Dios y'ayuc huidibi ca' chipity. Ti miich ajcxy m'ahuimbijtaaygixy ca' mic majaa ma mmibijcin. Hue' jeyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anactijc huidibi caagy caayb. ¹³ Pinjaty yajpatp ma jada ixpiñi huidibi ca' chipity, jadu'n yi' nej ma'xungdijc com ca' jajtcixy je ayuc tiy'ajt tiybi. ¹⁴ Je' tzipjatypi tiy'ajt je je' winjihuygixp, je' huidibi ymibijkin mij may mid'ajtkixpin, jidu'n nej je' huidibi y'aa ytitz jim ajkixyin je' titzpi jich kaagy je' ykaaygixpy, je' ko yjajtkixpy je' nej winjiwiygixichin je' huidibi oy, etz je' huidibi ka'oyin.

6

¹ Paady tzoc ñigi yajyujcpejtüm n'ixpiñi ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tñibi yhuinmañ yca'pxtaayñi. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcim Cristo. Ca' janam jatzojc

n'ixpijco'cim huidibi oga'n ti n'ixpijco'cim jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijco'cim Dios oga'n. ² Ca' jadüg'oc n'ixpijco'cim je ixpijcin müd je nibejtin ycixpi, etz jadu'n nej yajcñixajy je mibijcpidijc jaydëbi paadip ajcxy je Dios yjihui'ñ ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixi pocyjäydijc. ³ Chi njac'ixpijco'cim Dios y'ayuc je tzipjatypi, pen Dios jadu'n tzojcpy.

⁴ Com pinjaty ti huinjihuïy Dios y'ayuc ytiy'ajt, e jäygidägy huidibi Dios yejcpy, etz müdity Dios yjihui'ñ ma y'ay yjot, jadu'n je' nipaady nejihuïy chinay ma jin yticxin. ⁵ Etz ti ajcxy jäygidägy Dios y'ayuc ytiy'ajt, e ti jihuiygyxy Dios yjihui'ñ ymic'ajt huidibi yajtzinaayip ajcxy y'alma ma je xi je tiempo huidibi mümb cidacp. ⁶ Yi jadu'mbi jäy, pen tundigooyb ajcxy jadüg'oc müd Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios müd pocy ycixpi e pijtzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbidzimy nej ajcxy jadüg'oc yajcruudzpejtcixy je Dios y'ung müd ajcxy ypocy ycixpi, e nixiiccixy yajxiiccixy nej Jesucristo y'o'cy müd ajcxy ypocy ycixpi. ⁷ Jadu'n yi' ajcxy nej naax ni'uuctich naag'oc naag'oc ytu'y. E pen je naax yejcpy ooy cosecha ma pin ti ñipy ti ytuñ, Dios je' anajty yconuucxin ymüd. ⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuiip ma je mij jin. (Jada naax jadu'n jada' nipaady

jadu'n nej jäy huidibi ti ixmach ymibjcin.)

Yi huidibi nmibjcin yi' xyhuijtz'ijtım tudägy

⁹ Migügtijc ajcxy huidibi ooy ndzocyich, oy ñich ajcxy jadu'n njamüdmıydägyich miich ajcxy, janch nejhuıybich co ca' ajcxy ti m'ixmach yi mibjcin, etz nejhuıybich co oybi conuucxin mbaadaangixyp ma Dios etz m'alma ajcxy nıdzocin paadaangixy. ¹⁰ Com Dios ooy yi' ytudägyity, e ca' yi' jäydgoy huidibi miich ajcxy mdumyb müd yi' ycıxpı, jadu'n nej ooyjä'ajtın ti mdungixy müd jacjadyii mibjcpıdjc, e chambaad jadu'n mdungixy. ¹¹ Hue' ñich ajcxy ndzocyich co miich ajcxy nidüg nidüg mnixondaaccix tungix ooyjä'ajtın ixti mabaad m'öccixy, jigix mbaadıpy ajcxy tüg'ócıy huidibi ajcxy mjıjp'ıjxyp ma Dios. ¹² Ca' ñich ajcxy ndzojccixy co miich ajcxy m'ahuimbıdpy nuux. Padungix miich ajcxy jadu'n nej ajcxy ytungixy huidibi mibjcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuanıygixy.

¹³ Co jecy'ajty Dios moy Abraham je' y'ayuc, ci'm je' nıgapxpejty y'ayuc, com ca'anajty ji jac mıjpi pin nıgapxpedıpy je' y'ayuc. ¹⁴ Chi Dios Abraham nımay: "Janch co ñich miich ngonucxıp, e nmöhuıpy may m'ap'ung m'apmang." ¹⁵ E jadu'n Abraham y'ahuijxy müd mecxtujcin, e jadu'n ycıdıgııyı huidibi anajty Dios ti yaj'ahuanıyii. ¹⁶ Co ajcxy jäy ycapxcixy co yjanchıty, jim je' pin ñıgapxpejtp je y'ayuc, je pin jacmıjip, je' nıgapxpejtpy jada ayuc. E co nıgapxpety je' y'ayuc, chi je ayuc y'ity, e ca' huaad pinjatı ymına'ñ co ca' yjanchıty. ¹⁷ Paady ycıxpı Dios nıgapxpejty yci'm'ayuc, müd co

anajty yajnejhuñhua'ñ je jäy ajcxy co cuyduna'ñ y'ayuc tüibi ahuanïy. ¹⁸ Ji yajpaady mejtnax Dios y'ayuc huidibi ca' huaad capxtigach, e Dios ca' y'anüdügy nimina. E co Dios jadu'n tuñ, chi xyajjotcugüym mij, ñich ajt huidibi n'ixtaayim e ndzocim yi' ypubejtin. E ti nmijpidaacim yi' y'ayuc jadu'n nej jïjp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E müd co njïp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ijtım ca' ma tzigü'ñ jihui'ñ. Jadu'n Dios y'ayuc nipaady müd ñich ajt ycixipi nej tüg pujx huidibi je barco huon'ijtp mejyjoty, ca'ydi nej yjaty je barco. ñich ajt njïp'ijxim co ndigihuaanim ma Dios y'it tzajpjoty, tim jadu'n nej je judío sacerdote mïjtungmüdpı ytigüy anajty jecy'ajty ma Dios y'it ma je Dios ytıjc, je it huidibi anajty adıyducyıp müd huit. ²⁰ Tigihuaanim ñich ajt ma je Dios y'it tzajpjoty ma Jesús ytigüy müd ñich ajt ycixipi, Jesús ti yaj'ahuäch nej jëbi ndigüym ma Dios y'it. E jadu'n Jesús naydügpajc huingapxy etz codinäy mayjäy ma Dios yhuinduu huinixı huinıtıempo. Jesús ytung tim jadu'n nipaady nej Melquisedec ytuñ jecy'ajty.

7

Yı Jesús tim jadu'n ymıjıty nej Melquisedec

¹ Je Melquisedec hue' je' anajty rey'ajtp ma je cajp hıdı yxıı Salem, e je' anajty huingapxp ma je mıjpi janchypı Dios tzajpjotypı. Co anajty Abraham yhuimbıty co anajty oy ti chıptuñ, ma anajty je reydıjc oy ti yajqueec-huächtıy

ti mımadactäy, chi Melquisedec chooñ oy jıjpcoyöyïy Abraham, e chi ooy Dios mijuydacy minucxtacy mıid Abraham ycıxpi. ² Huidibi anajty Abraham ti paady ma anajty oy ti chiptuñ, chi je' pijc-huäcxy majcpıcy, chi pugooñ tüg-pıcy mooy je Melquisedec. Melquisedec yxıı hue' yhuimbıdzımy “rey tudägypı”. E com co anajty yrey'aty jim Salem, hue' Salem yhuimbıdzımy “jotcujc'ajtın”, paady jëbi nmınaanım jadu'n, “je rey huidibi jotcujc'ajtın yejcp”. ³ Je Melquisedec ca'p anajty yajnejhuıy ytaj yteedy, ni y'ap yteedy. Ni ycayajnimıydägy nej ypi'c'ajty etz nej y'ögy. Tım jadu'n je' anajty yajpaady nej je Dios y'ung, tüg huidibi huıngapxp jäy ajcxy ma Dios huınıxıı huınıtiempo.

⁴ Occuendıtungıxy mııch ajcxy nej je Melquisedec anajty ooy ymıjıty. Je Abraham, ııch ajt nmıj'ap nmıjteedy cı'm mooy Melquisedec je tüg pıcy pııı huidibi anajty ti pijcı je rey ajcxy ma oy chiptuñ. ⁵ Nej Moısés ycötujcın y'ane'my je' anajty ajcxy yhuıngapxy ma Dios ytıjc je pınjaty Levı y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc mııd co jäy ajcxy yajcuend'adıpy tüg pıcy je majc-pıcy pııı huidibi xıı diezmo. Oy je' anajty ajcxy ja'ajugy'adyıı ja'amıgüg'adyıı, com hue' anajty ajcxy Abraham y'ap y'oc nıdüg'ócıy. ⁶ Per Melquisedec oy je' anajty ca' Levı ap'adyıı teedy'adyıı, yajcujt je Abraham tüg pıcy je majc-pıcy pııı. Je' je' anajty huidibi cıdıgııyı tııbi anajty Dios yaj'ahuanıyıı. Jadu'n Melquisedec yajpuhuanıy Dios je Abraham. ⁷ Ni pın ycamına'nıp co ca' yjanchıty co je

pin conuucxin yejcp, jac mij je', ca'ydi je pin yajconuucxp. ⁸ Ya ma ich ajt, pin cidigiuyip tugpicy je majcpicyi (diezmo), hue' je' ajcxy jay huidibi oc. Per jadu'n nej anajty Melquisedec, jadu'n ymina'n ma yjaybetyity co je' yjactzinaayni. ⁹ E jebi yajmina'n co je Leví etz jadu'nyibaad je y'ap y'oc huidibi ajcxy huingapxp ma Dios, e yajcujtcixy Israel jay huidibi Dios patip, nañ jadu'n nipaady nej jihuüy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuüy Abraham ñigix'ajtyñi y'ap'ajtin yteedy'ajtin Leví etz jacjadyi je huidibi anajty ajcxy ca'ni ypi'c'atyñi yma'xung'atyñi co oy Melquisedec yjijpcobadyi.

¹¹ Je Israel cajp yajcidigiuyi je' je Dios y'ane'min ycötujcin je Levita ajcxy huidibi anajty huingapxp je mayjáy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttáy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxigy jadüg huidibi codinähuij je mayjáy ma Dios, ca' y'ocje'jin ma ymiiñ Aarón y'ap y'oc. Je jadügpí huidibi codinähuaamyb je mayjáy ma Dios, hue' copicy co tú'ciy naybadüyb mid Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ Ich ajt nHuindzin Jesucristo, je huidibi ñimiydacy ma Dios ñecy co huingapxa'n je mayjáy ma Dios, huingbi ap huingbi Teedy je' anajty, ca' y'ocLevijn. E ni tüg yi' y'amigüg ca' yhuingapxy ma Dios. ¹⁴ Huadz yajnejhuüy co ich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy

pinjaty anajty huingapxp je mayjäy ma Dios ytijc.

¹⁵ Jacniguëxícip jada ooy co jadüg ytigüiy huídibi tumb ma Dios, huídibi tú'ciy naybaatip müid Melquisedec. ¹⁶ Ca'p Jesucristo yajtungbïjci co huingapxp je mayjäy ma Dios müid je cötujcin huídibi mînaamb co yi' y'amigügtijc pátip yi' jadu'mbï tung, je huídibi ajcxy yjugy'ajtïn cixip tigoyip. Hue' je Jesucristo chinaayïn yjugy'ajtïn ca' ycixipy ytigoyipy ni mîna, paady ycixp Jesucristo yajtungbïjci huingapxp je mayjäy ma Dios. ¹⁷ Com müid je' ycixpi jadu'n Dios tïy'ajt yejcy co jadu'n ymîna'ñ:

Miich je' cham mhuingapxyp je mayjäy ma iich. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'mîn cötujcin huídibi Moisés yejc, ca' y'octuni cham, ca' jac ti mîc'ajt müidity co jaydëbi yajtzögipy jäy ajcxy y'alma. ¹⁹ Je Dios ycötujcin huídibi Moisés jayhui'm jecy'ajty, ca'p je' ni ti yaj'oybïdzimy yajhuätzpidzimy. Müid je huingapxpi ycixpi huídibi nmüid'ajtim cham jac'oy yi' huídibi njïp'ïjxim ma Dios.

²⁰ Co Dios Jesucristo yajtungbicy, chi nïgapxpejty yci'm ayuc co yjanchity. ²¹ Jacjadyii ajcxy huídibi anajty tungixp ma Dios ytijc, hue' je' ajcxy tungmooyi, e ca' Dios nïgapxpejty yi' ajcxy y'ayuc. Per co Jesucristo ytungbïjcy, chi Dios nïgapxpejty yci'm'ayuc. Com jaybety jadu'n ma Dios ñecy ma jadu'n ymîna'ñ:

Je Huindzin Dios ti nïgapxpety yci'm'ayuc, e ni mîna ycajotmetzcïhuipy.

Jadu'n Dios nîmay y'ung:

Miich mhuingapxamyb etz mgodinähuamyb je mayjäy ma ñch huinixi huinítiempo. Jadu'n miich mdunipy nej Melquisedec ytuuñ.

²² Com Dios ñigapxpejty yci'm'ayuc co yjanchity co Jesucristo ytungbiicy, paady yi Jesús yi' je' majamoy mic'ajtmoy je jemybi ayuc huídibi yahui'm miid jäy ajcxy ycixpi, je jac'oybi cötujcin.

²³ Jacjadyii huídibi anajty yhuingapxcixy ma Dios ytijc, nimay anajty ajcxy ooy. Com co tüg y'o'cy, chi huingbi ytigi'y ma je' ytung. ²⁴ Jesús com ca' yi' yjugy'ajtin ycixipy ytigoyipy ni mina, paady ca' ytung ixmach, etz ca' yi'ytungmöy ni pin. ²⁵ Miid je' ycixpi Jesucristo mic'ajt miidity jaydëbi yajnidzoocy jäy ajcxy y'alma huinixi huinítiempo, pinjaty mibijctzooyb Dios ma Jesucristo yxi. Jesucristo jëbi tunipy jadu'n, com yi' yjugy'ajtin ca' ycixipy ytigoyipy ni mina. E yi' Dios mibijctzodib miid jäy ajcxy ycixpi jabom jabom huinixi huinítiempo.

²⁶ Je Jesús je' je' tügpajc je mijtungmiidpi ma Dios, huídibi ñch ajt nyajmayajtim, je huídibi miid huädz yjot huädz yhuinma'ñ, e ca' je' miidity ni ti jibicpi ni ti pocy. Je' ca' tügnax y'ity miid pocytumbidijc. Nigi je' ymijity ycixity, ca'ydí jac ti huídibi yajpat tzajpjoty. ²⁷ Ca' Jesús yjadu'nity nej ajcxy jacjadyii huídibi tuun ma Dios ytijc jecy'ajty, co yaj'öccixy iyujc, e je' ajcxy yejcpy huindzigi'ñ jabom jabom, midüg co je' ajcxy ñayyajpocyñihuächyii, e chi jada' miid jäy ajcxy ypocy ycixpi. Jesús tügtecypajc je' yejc huindzigi'ñ miid mayjäy ycixpi, co je' ci'm ñayyejci ma yi' o'cin jadu'n nej tüg huindzigi'ñ. ²⁸ Je Dios ycötujcin

huidibi Moisés yjayhui'm jecy'ajty, hue' y'ane'my co huen tungmöy jäy ajcxy huidibi pocy mïd, co mïjtungmoy ma Dios ytijc. Chi jac'axam Dios yajhui'my jemybi ayuc jemybi cötujcin, e nïgapxpejty yci'm'ayuc co yjanchity. E mïd je jemybi ayuc Dios tungmoy yci'm'ung, huen yajnicxip je mïjpi tung ma yi' y'it, je Dios y'ung huidibi ijtp huinixi ca' ti bocy mïdity.

8

Jesús yi' je' je mïjhuingapxpi ma yi' Dios y'ayuc jemybi

¹ Huidibi ooy nïgi ycopicyity, huidibi yajnimiydaacp, co ïch ajt nmïd'ajtim pin xycodinaayim ma Dios, je' je' je Cristo, je huidibi jii by ijtp mïj'ane'mbi tzajpjoty, jadu'n nipaady nej jihuiy yi' y'ïñäy a'oy'amy ma Dios ymijc.

² Jii by je' ytuñ ma je janchypï Dios y'it ylugar, je amaaybi, huidibi oyhuindzigi'y ijtp. Je it huidibi Dios yajcoj, e ca' nmïnaanïm jäy ajcxy yajcoj.

³ Tüg'ócïy pinjaty huingapxp ma Dios, yajni bic y je' paady, e copicyity co cïyegipy ofrenda etz tijaty huindzigi'ñ ma Dios mïd jäy ajcxy ypocy ycixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios mïd jäy ajcxy ypocy ycixpi.

⁴ Co Jesucristo ixypiy ya y'ocyajpaady naaxhuiñ, ni ycahuingapxy ixypiy mayjäy ma Dios. Com jii ni ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcin y'ane'my.

⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tüg iixpejt nej Dios y'it

jiiby tzajpjoty, jadu'n yi' nipaady nej tüg anecpi huídibi tzomyb jiiby tzajpjoty. Co Moisés jecy'ajty Dios ytijc je' coji mïid huit, chi Dios ñimaayi: “Cuenditun yajxon co anajty mgojy je tijc tügenax jadu'n nej je ijxpejt huídibi nyaj'ijx jim copcixy.”

⁶ Per je mïitung huídibi Jesús ytumyb ma Dios mïid jäy ajcxy ycixpi, jac'oydung yi' ca'ydi je tung huídibi je jäy ajcxy ytumyb huídibi mïitung mïid ma Dios ytijc ya naaxhuiñ. Com jemybi etz jac'oy etz jacmïc'ajt mïid je cötujcïn huídibi Dios ymoy Jesús, ca'ydi je cötujcïn huídibi Dios ymoy Moisés jecy'ajt. Com hue' je' jac'oy alma nïdzoocïn Dios yaj'ahuanïy jäy ajcxy ma je jemybi cötujcïn.

⁷ Co je jay'ijp'atypï cötujcïn huídibi Moisés ymooyï cayaj'oyïydaayi jäy ajcxy ypocy mïid Dios, ca' yi' ixyipy ycopicyity je mïmetzpi cötujcïn huídibi Dios ymoy jäy huinjemy. ⁸ Per Dios y'ijx co je jäy ajcxy ca' yajxon cuydungixy je cötujcïn huídibi Moisés ymoy, jadu'n nej ymïna'ñ ma yjaybetyity ma Dios ñecy mïid je' ajcxy ycixpi, ma jadu'n ymïna'ñ:

Jadu'n je Huindzïn Dios ymïna'ñ: “Mimb xii tiempo ma huingbi cötujcïn nmöhuibich yi Israel jäy etz Judá jäy ajcxy.

⁹ Ca' y'ocjadu'nïñ nej ñch ngötujcïn huídibi nmooyich je' ajcxy y'ap yteedy jecy'ajty, je huin'it tiempo taabi nyajtzoofich ajcxy jim Egipto naaxjot. Ca'p je' ajcxy cuyduñ je cötujcïn huídibi ajcxy nmooyich, e paady ca' nduufich cuendi yi' ajcxy.” Jadu'n ymïna'ñ je Huindzïn Dios.

¹⁰ Jadu'n je Huindzïn Dios ymïna'ñ:

Je cötujcïn huídibi nyegaamybich ma Israel jäy

ajcxy co anajty yijadu'mbi xii tiempo ti ñaxy, jadu'n je'. Nbidägbich ngötujcin ma yi' ajcxy yhuinmañ, e jadu'n nipaady nej jihuïy ti njayich n'ayuc ma ajcxy y'ay yjot. E ñich yi' ajcxy xyDios'adiib, e yi' ajcxy njäy'adiybich.

11 Tüg'óciy ajcxy nejhuïhuipy pin ñich. Ni pin ji cayaj'ixpigipy pin je' je Huindzin Dios, ni pin, ni ymigüg, ni ymijin ymidijc, ni pi'ctijc ni mij'anäctijc. Com nidüg'óciy ajcxy nejhuïhuipy pin ñich; ypi'city ymutzity, ymijjäyity, etz ymij'anäcity.

12 E ñich yi' ajcxy nmeecxip yjibicjäy'ajtin, ni camina ngajac'ajihuïhuïybich ajcxy ypocy. Jadu'n Dios yminañ.

13 Co Dios je' ycötujcin jemybi nimiydägy, je' je' co yaj'amijyñi je jayijp'atpyi cötujcin. Je huïdibi amijyñip ca' je' y'octuunip, tzojc yi' yaj'ijxtigoyaani.

9

Je Dios ytijc huïdi ya naaxhuiñ etz Dios y'it huïdi tzajpjoty

¹ Je Dios ycötujcin jayijp'atpyi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jäy ajcxy huindzigïhuipy Dios. ² Je Dios ytijc jadu'n je' ycojity. Je jayijpi cuarto hue' anajty xijity Lugar Santo, jiiyby anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mimetzpi huit y'agiyducyity jiiyby jadüg'it huïdibi xijip Lugar Santísimo (ma Dios ni'ixcidägy je jäy). ⁴ Jiiyby anajty tüg mij mesa ac tim ori je' anajty ma ajcxy ypoomjojccixy, e

ma je' j̄im anajty y'ity t̄ug cajoon ac ori je' anajty yñin̄icx huiditȳi. J̄iiby cajoonjoty anajty y'ity t̄ug tu'tz ac ori huidibi anajty m̄id je j̄icxy ijxpejt̄ huidibi Dios Israel jāy ajcxy ymooy jecy'ajty. Etz j̄iiby anajty Aarón ytajc huidibi huijp huam. Etz j̄iiby anajty je tzaa y'ity ma je' anajty ycijxjayity Dios y'ane'm̄in. ⁵ Ma je cajoonn̄icx j̄im anajty je querubines ñ̄igojt̄udyitȳi huidibi Dios y'oy'ajtin m̄id. Je querubines anajty codinaayb Dios, e je' anajty ajcxy yajn̄id̄igooyb m̄id yqueec je cajonn̄icx ma ajcxy je huidziḡi'ñ̄ ñ̄i'py ypidacy m̄id jāy ajcxy ypocy ycixpi. Ca' huaad yjacyajnim̄iydacy mijcajee jadachambi tijaty huidibi anajty yajpatp j̄iiby ma Dios yt̄ijc.

⁶ Jabom jabom co anajty jadu'n y'ijtt̄ay ni'ixi', chi je huingapxpi yt̄iḡi'yḡixy ma Dios yt̄ijc ma je jayijpi cuarto, je Lugar Santo, tuñ ajcxy huindziḡi'ñ̄ etz cuydunḡixy y' ajcxy yt̄iy'ajt̄ m̄id Dios ycixpi. ⁷ J̄im̄ijt̄ j̄im̄ijt̄ ma je mimetzpi cuarto huidibi je huit ad̄iydujcp, j̄iiby yt̄iḡiy t̄ugtecypajc je huingapxpi huidibi jacm̄ijtungm̄id ma Dios yt̄ijc. E co j̄iiby yt̄iḡiy, chi mid̄iḡiy huaj ñ̄i'py, huidibi m̄id huindziḡi'iy Dios m̄id yci'mbocy ycixpi etz m̄id t̄ug'óc̄iy jāy ajcxy ypocy ycixpi etz m̄id ajcxy ypocy ycixpi co ca' nejhūi'yḡixy co ytund̄igooyḡixy. ⁸ M̄id jada ycixpi je Esp̄iritu Santo xyajnejhūi'ym̄ co je tungm̄idpi huidibi huingapxi je mayj̄ay ma Dios, ma ajcxy jacyajtunḡixy anajty je jayijp cuarto ma Dios yt̄ijc, chi ca'ni je' anajty y'ahūach̄ñ̄i nej j̄ebi pinjaty yt̄iḡiy ma je it lugar Sant̄isimo ma Dios yhuinduu. ⁹ Je Dios yt̄ijc huidibi ijtp anajty ya naaxhuiñ ca' je' yj̄ej̄ity je janchypi. Hue' je'

anajty ijxpejt'ajtp huidi Dios y'it'ajtpy tzajpjoty. Jiiby je tungmüdpí huindzigíy Dios müd ofrendas etz müd huindzigí'ñ. Per jada huindzigí'ñ ca' yajtigoy je pocytuní ma je jäy ajcxy yjot yhuinma'ñ. ¹⁰ Je judíojäy ytiy'ajt huidibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy ñayyajpocyñíhuáatzigixy müd ní etz canaag costumbre huidibi ajcxy cuydumyb. Jadu'n ajcxy ytuñ ixti cooni Dios yajtigajztay tüg'óciy yí ycötujcin.

¹¹ Per ti y'oy ya naaxhuiñ je Cristo, e yí je' cham ijtp jacmíjtungmüdpí ma Dios, yí ti mímiñ jemybi cötujcin jac'oybi. E yí je' codinaayb je mayjäy ma Dios y'it tzajpjoty, je it jac'oybi jacmíjpi, jacca'pxypi, ca' nmínaaním jäy ti cojy, e ca' yaajity naaxhuiñ. ¹² Cristo ti ytigíy ma je Dios y'it, je lugar Santísimo. Ca' ti ytigíy müd co jiiby yajquëxíga'ñ pí'cchivo ñí'py o toro ñí'py, hue' yci'mní'py jiiby yejcpy ma Dios. Jadu'n ti ytigíy tügtecy tigíy huinixí huinítiempo, etz xyayanídzooxim ajt n'alma huinixí. ¹³ Ooy yjanchity co yí toro ñí'py etz je chivo ñí'py etz yí cuyjam co ajcxy nöccixy huaj níx ma je Dios ojadajttac, co ajcxy je pocyjäy yajníhuäxcixy je ní'py etz yajnixídujtcixy je cuyjam ymüd mic'ajt co yajpocyhuáatzigixy ñinícx, per jotjoty ca' yajhuäch. ¹⁴ (Je huingapxpi huidibi tumb ma Dios ytijc ya naaxhuiñ ca' ymadägy co jäy yajpocyhuädziipy müd toro ñí'py), Jesucristo nígi ti ymadägy yajpocyhuäch jäy ajcxy müd yci'mní'py. Com Jesucristo ymüd je Dios yjihuí'ñ ymic'ajt huidibi ca' ycixípy ytigoyípy ní mína, chí ñaygíyejci cí'm ma Dios müd Dios yjihuí'ñ

ymic'ajt, jadu'n nej tüg huindzigi'ñ huätzpi, com ca' ni ma ni ti tundigoy. E mïid yci'mni'py Jesucristo xyajhuaatzim je jibicpi ma ajt njot nhuinma'ñ, ca'ydi ndunim huidibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady yi Jesucristo yi' je' huingapx'ajtp ma Dios mïid ïch ajt ycixpi mïid je jemybi ycötujcin huidibi Dios yajhui'm. Yi Jesucristo co y'o'cy, yi' ajt je' nbocy xymecxim tiibi ndundigooyim ma je jayijp'atyp cötujcin huidibi Moisés jayhui'm. E jigix pinjaty Dios ti yhuin'ixyii, jëbi ajcxy yc'idig'iyii je tzinaydac ma jëbi n'ijtim huinixii. Je tzinaydac huidibi Dios ti xy'ahuaniiyim. ¹⁶ Co tüg jäy jïjp'ixy y'o'cin, e yajcojy tüg testamento, ooy ycopicyity co yajnejhuihuipy pen janch je' ti y'ögy je pin yajcoj je tiy'ajt jigix je' ytigihuipy tumbi je tiy'ajt. ¹⁷ Co tüg jäy jïjp'ixy y'o'cin e yajcojy tüg testamento, ca' je' ti mic'ajt mïidity je testamento pen jugy'ajtni pin je' anajty ti yajcojy. Huin'itni janchtiy co anajty ti y'ögy, huin'it je testamento mic'ajt mïidity. Je jemybi tiy'ajt huidibi Dios xyajhui'my jadu'n yi' nipaady nej jäy testamento yajcojy co anajty jïjp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' mïid iyujc ñi'py. ¹⁹ Moisés je' capxhuäcx je Dios ytiy'ajt ma tüg'óciy mayjäy. Chi jada' huijtzägy tüg lana tzaptzpi mïid tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity mïid ñii, chi Moisés yajnihui'ch je libro mïid je ni'py, je libro huidibi anajty ti capxy etz nañ jadu'n jäy ajcxy yajnihui'ch je ni'py.

20 Co Moisés jadu'n ytuuñ, chi ymīnañ: “Jada je' je ni'py huídibi yajtzoobatp je ane'mīn je tiy'ajt huídibi Dios ti yecy ma miich ajcxy.” 21 Moisés nañ jadu'n ñi'pyñihui'ch je cochac tījc ma anajty yDios ojadajtcīxy, e tūg'óciy tumbajt huídijaty jīby tumb. 22 Dios ycōtujcīn, je jecyīp, ymīnañ co tūg'óciy huídijaty yajtungīxyp co Dios ojadajtcīxy, copīcy yajhuādzipy mīd ni'py. E pen ca' ajcxy teemy yocy ni'py, Dios ca' huīnmecca'ñ yi' ajcxy ypocy.

Co Cristo y'o'cy mīd ajt nbocy ycīxpī, yi' yajnicxy ajt nbocy

23 Ooy jada anajty ycopīcyīty iyujc ñi'py huīndzīgī'ñ, jīgīx yhuādzip huídijaty tumb ma Dios ytījc ya naaxhuiñ, je huídibi iīxpejt'ajtp anajty nej Dios y'it jīby tzajpjoty. Per je Dios y'it huídibi jīby tzajpjoty chojcpy jac'oybi huīndzīgī'ñ ca'ydi huídī ya naaxhuiñ. 24 Com Cristo ca' je' ytīgīy ma Dios ytījc huídibi jāy ajcxy ti cojy. Je tījc huídibi jāy ajcxy ti cojy, je' je' ñīgojtuutīn je it lugar janch janchypī huídī jīby tzajpjoty. Cristo tīgīy ma je Dios y'it ylugar jīby tzajpjoty, ma je' cham xycodīnaayīm ma Dios yhuīnduu. 25 Je judío mījtungmīdipi huídibi huīngapxp ma Dios ytījc, huīnjīmījtīty ytīgīy ma je Dios ytījc co yecy ni'py huídibi ca' cī'mni'py'adyīi. Cristo ca' yi' ñay'ahuanīyīi y'ōgīpy canaag'oc, jēyi tūgtecpajc ytīgīy ma Dios y'it mīd ycī'mni'py. 26 Co īxyipy ca' yjadu'nīty, canaag'oc Cristo īxyipy patnī chaachy'ōcīn maabi naaxhuiñybi chondagy. Per jadachambi ma xīi tiempo ycīxaani ytīgoyaani, Cristo tūgtecpajc ñayguēxīci ya naaxhuiñ, jīgīx codīnāhuīpy tūg'óciy jāy ma Dios mīd ajcxy ypocy ycīxpī. Jadu'n Cristo

tuuñ jigix yajtigoyipy pocytuni. ²⁷ Dios ane'min pidac ya naaxhuiñ co nidüg nidüg jäy paadip yi o'cin tügtecypajc. E Dios ti pidägy je xii je tiempo mina tyduna'ñ nidüg nidüg jäy miid ypocy ycixpi. ²⁸ Je Cristo jotcuyc tügtecypajc nayyejci ma je o'cin co yajpocyñihuaatztäy je mayjäy. Chi jada' ñayguëxiga'nyii je mimejtz'ocpi ya naaxhuiñ, e ca' nmīnaanīm co yajpocyñihuaatzaanip jadüg'oc je mayjäy, hue' je' nihua'namyb ycohua'namyb tüg'óciy pinjaty jipp'ixip cixyjot huinijot co je' miina'ñ miid yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjējity je oybi. Paady je cötujcin huidibi Moisés yjayhui'm ca' je' jēbi huadz yaj'ahuimbity pinjaty pocy ytumb, pinjaty mijhuäcp anajty ma Dios miid je iyujc huidibi ajcxy Dios yajhuindzigiiyb, huidibi ytun'ahuimbijtcixyp jimijt jimijt. ² Co ixypy je cötujcin y'ocmadägy huidibi Moisés yjayhui'm yaj'ahuimbity ixypy huadz ajcxy je pocy ytumbi, ca' ixypy je jadu'mbi huindzig'i'ñ y'ocyajtuuni jimijt jimijt. Com pin je jadu'mbi huindzig'i'ñ yejcp, co ixypy je' ypocy yajnicxtäy, ca'p je' ma ñayjihuihuiyb ti bocy miidity jadüg'oc. ³ Co jadu'n yaj'öccixy je iyujc miid ypocy ycixpi, je' je' je' tiy'ajt co ajihuiygóotigixy ypocy jimijt jimijt. ⁴ Com yi huaj mang ñi'py etz yi chivo ñi'py ca' mic'ajt miidity co pocyyajnicxtähuiy nimina.

⁵ Paady co Cristo ymiiñ ya naaxhuiñ, chi nimay je Dios:

Ca' miich ni ti huindzig'i'ñ mdzojcnì ma ymiñ
iyujc'ögy, ti miich xyñ'i'ixi'yich tüg ninìcx.

⁶ Ca' m'ocjäygidaaacni huindzig'i'ñ iyujc huìdibi ya-
jno'cp. Ca' miich m'ocjäygidaaacni co jäy
xyajhuindzigiy iyujc müid ypocy ycixpi.

⁷ Chi nmìna'ñich: “Dios, cha nmiiñich jigix mi-
ich mdzojcin yajcuydunipy, jadu'n nej yjay-
betyity ma miich mnecy müid ìch ycixpi.”

⁸ Tim jayijp, Cristo ymìna'ñ co Dios ca' octzojcnì,
ni cajäygidägy je iyujc ögy huìdibi yajhuindzigiyip,
ni je huìdibi yajno'cp, jigix je pocyñicxtähuipy, oy
yi' yajëjity huìdibi ñigapxy yajtunipy ma je Dios
ycötujcin huìdibi Moisés yjayhuim. ⁹ Chi jada'
jadüg'it yjaybetyity co Cristo jadu'n ymìna'ñ: “Cha
ìch nmiiñ, jigix müich mdzojcin yajcuydunipy, mi-
ich huìdibi Dios'ajtp.” Hue' mìnanim, yajtigoy
je cötujcin huìdidi ane'mb co jäy ajcxy huindzigiiy
iyujc müid ypocy ycixpi, etz mic'ajt mo' je jemybi
cötujcin huìdibi Jesucristo xymooyim. ¹⁰ Dios
jadu'n ti xyajhuaatzim ajt nbocy, com Jesucristo ti
tuunì Dios chojcin co ci'm ñinìcx tügtecypajc yejcy
ma yi o'cin müid tüg'óciy jäy ypocy ycixpi.

¹¹ Tüg'óciy judío sacerdote huìdibi tungmüid ma
Dios ytijc jabom jabom jadu'n tun'ahuimbijtcixy
tügpì huindzig'i'ñ, huìdibi ni camìna yajnicxtaayi
jäy ajcxy ypocy. ¹² Yi Jesucristo tügtecypajc yi'
yejcy ñinìcx ma yi o'cin huinixi huinìtiempo,
chi jada' y'ixtacy a'oy'amy ma Dios ymijc ma
ane'mdäy tüg'óciy. ¹³ Jiiby tzajpjoty Jesucristo
cham y'ahuixy, ixti coonì Dios yi' ymidzip
mimadactaayip, e jadu'n ajcxy nipaadipy nej
jihuiy Jesucristo ytecypocxpejt. ¹⁴ Müid tügpajc

je huindzigi'ñ huidibi Jesucristo yejc, tudägy yaj'ahuimbijttäy huinixi huinitiempo pinjaty ti ypocyhuäch. ¹⁵ Yi Espíritu Santo nidiy'ajtp ma ich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

¹⁶ Je huin'it xi je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäymedzaanich ajcxy ypocy, etz jadu'n nej ajcxy ytundi gooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ miiid pocyhuinmeecxin ycixpi.

Chojcpy nmihuingoonim yi Dios

¹⁹ Paady miich ajcxy migügtijc, jëbi ich ajt ndigiiyim agujc jotcujc ma Dios yajpaady miiid co Jesucristo ti temy ti yocy ñi'py miiid ich ajt nbocy ycixpi. ²⁰ Cristo ti yaj'ahuäch je nii'aa je tü'aa miiid ich ajt ycixpi miiid yci'm ninicx, je nii'aa tü'aa jemybi oybi huidibi tigiiyb ma Dios y'it. E je' yñinicx jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuiñ, je huit huidibi cichhuäcx co Cristo y'o'cy. ²¹ Jesucristo yi' je' je miiitungmiiidpi huidibi xycodinaayim ma Dios ytijc jiiiby tzajpjoty. ²² Paady ycixpi jëbi nmihuingoonim Dios miiid oyjot oyhuinma'ñ, etz miiid je miiibjcin janchypi. Cristo ajt ti xyajhuaatzim njot nhuinma'ñ co ñi'py temy yojcy miiid ajt nbocy ycixpi jigix

ca'ydi najjihuuyim pocymiid, jadu'n nej jihuuyi ti ndziihuim miid huadz nii. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tibi xyaj'ahuanuyim. ²⁴ Tzoc nhuinmañypidaacim co njot'amijmooyim ajt nmigügtijc, jaydëbi naychojcin najjihuuyim miñ xyipy, e nduunim ojäy'ajtin. ²⁵ Ca' n'ixmajtzim je nayyöymugii, jadu'n nej ajcxy nijëjity costumbre miidity co ca' ajcxy yöy ma naymujctac. Niği tzoc najjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chonañ tzajpjoty.

²⁶ Pen ich ajt jacpocytunim tzojcingixy ma anajty ti nejhuuyim Dios ytiy'ajt, ca'p ji huingbi huindzigiñ huidibi xyajpocyhuaatzim. ²⁷ Je' janchtiy njacijp'ijxim miid tzig'iñ jhuiñ je tzaachypi co anajty Dios xtyidunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycötujcin huidibi Moisés yjayhui'm, e jim metz o tugig testigo co yjadu'nity, yajmoy je' y'o'cin ca' miid'ajty ti pa'ayoohuin. ²⁹ ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixañ Dios y'ung etz nixiici yajxiici Cristo ñi'py huidibi yajpocyñihuaatzp, jadu'n nej je jemybi ayuc yminañ huidibi Dios yajhui'm. Etz nañ jadu'n ajcxy ni'ojhygixy Dios yEspíritu huidibi may'ajt oy'ajt tumb miid je' ajcxy. ³⁰ Nejhuuyim co je Huindzin Dios yminañ: “Ich xypatp ndzaachtunipyich jäy ajcxy miid ypocy ycixpi. Ich yi' nyajcomidohuipy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios

yi' yjāy t̄ydun̄ipy.” ³¹ ¡Ooy chach mij y'ayo'nity pen je Dios juugyp̄i xychaachytun̄im m̄id ajt nbocy yc̄ixpi!

³² Per ajihūiyiḡixy miich ajcxy je x̄i je tiempo t̄ibi ñaxy, je taabi miich anajty ajcxy ti xyc̄idiḡiyiḡixy je t̄iy'ajt janchyp̄i, ñipaty je' anajty nej t̄üg t̄icxin̄ jaj̄in ajcxy m̄idity. Ti ooy mhuind̄inaayḡixy mjijpt̄inaayḡixy tzaachyp̄i ayo'n m̄id yi mm̄ib̄ic̄in yc̄ixpi. ³³ Nij̄jity miich ajcxy ti myajhuingapxn̄ajxc̄ixy, e ti myaj'ojc̄ixy mayj̄yduum. Nañ jadu'n jacjadyi ti abaatc̄ixy tzaachyp̄i jadu'n nej je t̄ibi ajcxy ooy yajtzaachytunḡixy. ³⁴ Ti miich ajcxy myajtunḡixy pa'ayo'n ma pinjaty anajty pujxt̄igotȳp, e janch agujc jotcujc ajcxy ti myajtunḡixy mecxtujc̄in co ajcxy xyp̄ic̄i tijaty anajty ajcxy m̄id. Nejhūiyim co j̄iby tzajpjoty miich ajcxy m̄idity ti jaty jac'oyb̄i h̄uidib̄i huin̄ix̄i huin̄itiempo ijtp. ³⁵ Jacm̄ijp̄idaacc̄ixy Dios, ca' m̄jotmetzc̄iyḡixy. Co mm̄ijp̄id̄aacc̄ix̄ipy Dios, huin̄'it ajcxy mbaad̄ipy oyb̄i may'amy ma Dios. ³⁶ Chojc̄py co miich ajcxy myajtunḡix̄ipy mecxtujc̄in co mguydunaanḡixy nej Dios tzocy, e Dios xyajc̄idiḡiyiḡix̄ip h̄uidib̄i yi' ti ahuan̄y. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiinañ je h̄uidib̄i tzonamb tzajpjoty, e ca'p je' jecyñity.

³⁸ Jadu'n Dios yminañ:

Pinjaty ñich ti nḡöbicy co ytud̄agyj̄ayity, tzin̄ahuip je' m̄id ym̄ib̄ic̄in. E pen ixtiḡihua'cp ma ym̄ib̄ic̄in, ca' jadu'n n̄jotcujc'ad̄ipyich m̄id je'.

39 Ca'p ñch ajt njëjity huídibi ixtigíhua'cp ma nmíbijcín, e ytigoy y'alma, je' ñch ajt pín míbijcp, e jadu'n n'alma paadípy nídzoocín.

11

Yi míbijcín

1 Jotcuje nayjihuíyím jadu'n co huídibi nmíbijcím janch yí', oy co ca' n'íjxim. Je huídibi nmíbijcím je' xymooyím jotcuje'ajtín míd huídibi njjip'íjxim ma Dios. Je huídibi nmíbijcím nejhuuíyím co janch janch jadu'n, oy ca' n'íjxim.
2 Com míd co ajt nmíj'ap nmíjteedy ajcxy míbijci Dios y'ayuc paady Dios cóbijcy ajcxy jadu'n nej tudägyjäy.

3 Míd ajt nmíbijcín ycíxpi nejhuuíyím co Dios oyduñ tüg'óciy huídibi jii'ajtp míd y'ayuctí'ajty, jigix huídibi cham n'íjxim je' yí' yaj'oyíy huídibi ca' yaj'ixy.

4 Míd co Abel míbijcy Dios, paady Abel ymoy Dios huíndzigi'ñ jac'oybi ca'ydi Caín, e Dios cóbijci Abel yhuíndzigi'ñ, e míd je' ycíxpi Abel ooy ycömaybidzimy ma Dios co anajty ytudägyity. E jadu'n oy Abel tí yja'o'cini, jadu'n nipaady nej jihuíy yjacmíydägyñi chambaad. Com míd je míbijcín huídibi anajty ymíd yejc íjxpejt ma ñch ajt.

5 Míd co Enoc míbijcy Dios paady yajnicxi jadügpí tzínaydac ní yca'o'cy, ní ca' ajcxy paty, com Dios anajty tí yajnicxyii. Jadu'n ymína'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayín." 6 Pen ca' nmíd'ajtím míbijcín ní jadu'ñyi, ca' Dios jäygidägy

ajt ndzinaayin. Com co nmihuingonaanim Dios, hue' tzocy co nmibijcim co Dios yjiijity, e co yaj'ahuimbidipy oybi müid pin mibijcip.

⁷ Müid co Noé mibijcy Dios, paady Dios ñimaayi jayijp co ytuna'ñyii yjada'ñyii mijñigom huídibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñigomdzögipy. Müid co anajty Noé müdity mibijcin, paady yajpocycäy je naaxhuiñyäjy ajcxy ca'pi ymibicy. Chi Dios cöbijcy Noé jadu'n nej tudägyjäy müid co mibijci Dios y'ayuc.

⁸ Müid co Abraham anajty Dios mibicy, paady Dios yhuin'ijxi e ycapxymidouhui. Chi je' choñ ma ñaax ycajpın ñicxy ma je it lugar huídibi Dios anajty möhuaanip co je'adüyb. Choñ, ni ca' anajty nejhüiy ma ñicxy. ⁹ Müid co Abraham mibijcy Dios, paady chinaydacpijcy nej tüg huingjäy ma je naax huídibi Dios yaj'ahuanüiyi, huídibi ca' yjējity. Chinay ma huittijc, nañ jadu'n ajcxy y'idüich Isaac etz Jacob huídibi ajcxy nañ jadu'n Dios yaj'ahuanüiyi je naax. ¹⁰ Abraham je' anajty y'ahuijxyp mina jēbi chinaydacpijcy ma Dios y'it ylugar huídibi jadu'n nipatp nej tüg cajp huídibi müid y'ijx ta'tzpijcy y'oyduñity, je huídibi Dios ñihuinmayüiy, je huídibi Dios yajcojy yaj'oyüiyb.

¹¹ Sara hue' anajty pumäy, ti anajty ymijäyüñi, ti ñajxni tiempo mina jēbi y'ung'ixy. Per müid co mibijcy Dios y'ayuc huídibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tibi ahuanüiy. ¹² Müid tügpi jäy, je Abraham, ti choondacy tügpijcy y'amigügtijc

huídibi oy ti ymayíy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'ócíy je jäy ajcxy huídibi ya yajnimíydacp, öctay ajcxy ni ycacídigiíyí je tzínaydac huídibi anajty Dios ti yaj'ahuaníyí. Míid co ajcxy míbijcy Dios, paady nejhúíy ajcxy co jacíini Dios ymöhúíyb je huídibi ti yaj'ahuaníyí. Com ymíbíjç ajcxy Dios, paady jotcujc ñayjihúíyí co Dios möhua'ñyí jacíini huídibi ti yaj'ahuaníyí. Ymínañ ajcxy co anajty y'adzínaaygíxy ya naaxhuíñ. ¹⁴ Pinjaty jadu'n mínamb co adzínaaybí ajcxy yajpaady, hue' yajhuimbídzímy co chinaydac yjugy'ajttac ajcxy y'ixtaayb. ¹⁵ Co ixípy ajcxy jáymejtzó'cígíxy je naax ma anajty ti choongíxy, janch ycahuimbíjty ajcxy jim jadüg'oc. ¹⁶ Per je' ajcxy nígí anajty nijot'ajtcíxy it lugar jac'oybí, je' je' je' tzajpjotyí. Míid jada ycíxpí Dios ca' yí' cho'yduñ co ñaydíjyí Dios ma je' ajcxy. Com ti ni'ixíyí ajcxy chinaydac jíiby tzajpjoty.

¹⁷ Abraham míbijcy Dios, e co Dios Abraham y'íjxmajtzi, chi yajmííñ Isaac co anajty yajhuíndzíghua'ñ Dios. E janch cíxyjot je y'ung túgpajç anajty yecy, je y'ung huídibi Dios ti yaj'ahuaníyí anajty. ¹⁸ Dios ñímay Abraham co míid Isaac míid'ada'ñ may y'ap y'oc. ¹⁹ Abraham yhuinmaayb anajty ooy co Dios túgpajç cötujcmíidíp yajjugypígípy öcpyí. Paady jébi ích ajt nmínaaním co Abraham ycídigiíyí jadüg'oc y'ung co anajty ti yjugypícy co anajty ti y'ögy.

20 Isaac mibijcy Dios, paady Isaac Dios mibijctzoy mïd Jacob etz Esau ycixpi co huen ajcxy oybi paadip ma je tiempo huidibi mim cidacni. 21 Jacob ymibijcy anajty Dios, paady co anajty y'ogaani, chi ahuanïy conuucxin ma nidüg nidüg José y'ung y'anäg. E jadu'n Dios ooy huindzigïy ojadajty yam ñaygodajc'adyii mïd ytajc co anajty ooy ti ymijjäyïyñi. 22 José co anajty Dios mibicy ma anajty y'ogaani, yminañ co Israel jäy ajcxy anajty ypidzimaangixy comjegy jim Egipto, chi yajhu'my tïy'ajt nej ypajc ytunïyb co anajty choñ ajcxy jim Egipto.

23 Mïd co anajty ajcxy mibicy Dios, paady co Moisés yma'xung'ajty, chi ytaj yteedy yützi tugïg po'. Com co ajcxy ijxy co anajty ooy y'oyty je ma'xung, ca' ajcxy anajty tzigïy je rey y'ane'min co anajty yaj'öctähua'ñ tüg'öciy ungma'xung yëydijcpi. 24 Mïd co Moisés mibijcy Dios, paady co oy ymij'anäccojni, ca' tzojcy co ñaydijïyb co rey ñïx y'ung'adiib. 25 Hue' janchtiy Moisés ñigi nijot'ajty co ayo'n tzaachypi minaxipy yajnaxipy quipxy mïd Dios yjäy, ca'ydi co nixondägiy je jugy'ajtin ma je rey ytijc huidibi Dios ca' jäygidägy. 26 Moisés ñigi ñayjihuiyi jotcuyc co tzaachypi ayo'n anajty minaxy yajnaxy mïd Cristo ycixpi, ca'ydi co mïd'ajttähuiy py jugy'ajt comeen'ajt jim Egipto. Com Moisés ti anajty yhuinma'ñypidägy co Dios yega'ñ je oybi. 27 Mïd co Moisés mibicy anajty Dios paady choñ jim Egipto, ni catzigïy co anajty rey yjotmädy, jadu'n y'ijty tudägy nej jihuiy ixy je Dios ca'pi yaj'ixy.

28 Mïd co mibijcy Dios paady Moisés tuuñ je

pascuaxi, chi ni'ane'mdiy co huen tijc'aguu tüg tüg yajni'pyi, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Miid co ajcxy mibijcy Dios paady je israelitas ajcxy yajnajxy je tzaptz mejy jadu'n nej jihuïy ñajxcixy huindïztuuy, e co ajcxy je Egipto jäy nañ jadu'n yjanaxañ, cijx ajcxy ñi'o'ctäy.

³⁰ Miid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtuyc xi. ³¹ Miid co Rahab, je töxyjäy jibic tzinaaybi, mibijcy Dios, paady ca' y'o'cy quipxyi miid je huidibi anajty ca' capxymidoogixy Dios. Com co je' yajjättacy ma ytjcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcïyögixy yajtecyyögixy Canaán naaxjot.

³² ¿Ti njacmiydägibich? Nyajtigoy'idaamybich tiempo co nimïydägibich Gedeón, Barac, Sansón, Jefe, David, Samuel, e jacjadyii Dios y'ayucnajtzcaxiïybi. ³³⁻³⁴ Miid co ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuanïyigixy. Yaj'adujc ajcxy caa y'ahuac, yajxeem ajcxy jin huidi anajty ooy ymijity, tzooc ajcxy co anajty yaj'ögaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjäy yjajtigixy huidibi ajcxy cidigiiy y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n

ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcapxiiybi ooy ñixiici yajxiici, yajci'ajty, etz tzumy mach ypujxtijc'iñäy. ³⁷ Jadyii Dios y'ayucnajtzcapxiiybi y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci mïd espada. Ymiñ xyijpy xii yaa yhuidiitcixy ymiid ajcxy ñinicx yüch mïd cöbixy'ac etz mïd chivo'ac, ayoob jäy ajcxy, jotmay mïd, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcapxiiybi ajcxy ni je naaxhuiñyjäy anajty camihuaadity. Mïd ymidzip pahuiditcixy, paady yhuidiitcixy anajty titznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'ócüy je' ajcxy oy cömay ajcxy yjanajxy mïd co mibijcy ajcxy Dios, ca' ajcxy paty tübi anajty Dios y'ahuanïy. ⁴⁰ Com Dios jac'oybi je' anajty yegamyb mïd ñich ajt, paady ca' ajcxy paty je oybi tübi Dios y'ahuanïy. Ti anajty Dios nihuinmayïy co yajca'pxaani yi' ajcxy ytudägy'ajtin quipxyi mïd ñich ajt co Cristo y'o'cy mïd ñich ajt nbocy ycixpi.

12

Tzoc ñich ajt nhuinmañybidaacim ma Jesús

¹ Com nmïd'ajtim canaag ijxpejt nej jäy jecy'ajty mibijcy Dios, paady ñich ajt jadu'n nipaady nej jihuïy huinduy jajixci'py nmïd'ajtim jäy huidibi ti yajniguëxigy ymibijcin. Paady ycixp tzoc ahuing pidaacim je huidijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinmañydiigooyim,

e tzoc naymic'ijxim cuydunim yi tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquípxigixy. ² Tzoc nhuinma'ñybidaacim ma Jesús. Jim iixpejt nbaatim ma Jesús nej jëbi nmibijcim Dios. Jesús yi' je' ti xyajnejhuuyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuuyb anajty co jadu'n y'oc'ayoohuipy, chi ypaadipy jotcujc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'ojyigixy, etz ca' y'ixaani, paady ca' mdzjpcigixy ni mgamijotmetzcigixy. ⁴ Ca'ni miich ajcxy ayo'n tzaachypí myajnaxy mabaad ni'py ajcxy mxibidyii jadu'n nej Cristo yjajty. ⁵ ¿Nej ti miich ajcxy mjäydigooygixy je capxhuijin huidibi Dios ti xymooygixy nej jihuiy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuiy ca' ytim ytiijity je tzaachypí huidibi Dios miid xycapxhuijy, ni ca' mjotmetzcihuipy co xyaj'óipy.

⁶ Dios ycapxhuijpy yi' pinjaty chojcpy yjihuiyb. Dios chaachytumby yi' ajcxy co ytundigooy, pinjaty yi' ti cöbicy nej jihuiy yci'm'ung.

⁷ Mímadaaccix miich ajcxy je castigo, com Dios jadu'n yi' xymidity ajcxy nej jihuiy yci'm'ung. ¿Nej ji jada' tüg ung, e ca' yteedy chaachytunuyb co ytundigooy? ⁸ Pen ca' miich ajcxy Dios ti tzaachypí xymooygixy, jadu'n nej yi' moy

castigo tüg'óciy y'ungdijc y'anäctijc, ca' miich
ixyipy ajcxy Dios xy'ung'adyii tÿdudägy. Jadu'n
miich ajcxy m'idipy nej tüg pi'c'anäg huidibi
yteedy ca' y'ixa'ñyii. ⁹ Jadüg nax, taabi anajty ajt
nbi'cnity, ïch ajt ndeedy ya naaxhuiñ xy'ïhuijim
xycapxhuijim anajty, e xychaachytuunim co
ca' ngapxymidoohuim nhuindzigïyim ajcxy.
¿Nej co ca' huaad n'ijtim ane'my ma ajt ndeedy
huidibi tzajpjoty yajpatp? E jadu'n jëbi nbaatim je
jugy'ajtin huidibi ca' ycixipy ytigoyipy nimina.
¹⁰ ïch ajt ndeedy ya naaxhuiñ xy'ïhuijim
xycapxhuijim anajty mïd jada conbi jugy'ajt
ycixpi, jadu'n nej je' anajty ajcxy oy'ixy. Nañ
jadu'n Dios ïch ajt xychaachytuunim mïd ajt
n'oy'ajt ycixpi etz jigix nmïd'ajtim huädz jot huädz
huinma'ñ nej Dios ymïdity huädz yjot huädz
yhuinma'ñ. ¹¹ Oy yjanchity co ca' ti tzaachypi
ndzojcm ma yam nbaatim je tzaachypi, com
ooy ndzachjihuiyim je tzaachypi, e ca' jotcuyc
nayjihuiyim. Per pinjaty ixpijcpï Dios chojcin mïd
je tzaachypi ycixpi, chi je' yhuimbïdzimïygixy tüg
jugy'ajtin tädägypi etz jotcuycpi.

*Je huidibi ayo'ngojp co Dios y'ayuc
ngacöbigaanim*

¹² Paady miich ajcxy jotmicpijccix ma
mmibijcin, jadu'n nipaadip nej jihuïy
myajpidiccixy mgi' tibi y'anucxiyñi, etz
mgoxcohuajc mic'ajt paady huidibi anajty ca'
mic'ajt mïdity. ¹³ Ixtaaygix nii'aa tü'aa tïybi ma
mdzinaayin, jadu'n nipaadip nej jihuïy yi mdecy
huidibi mädipti chögy, e camina jadüg'oc yhuuidip.

14 Tzinaaygix mïid oyjot oyhuinma'ñ mïid nidüg'óciy jäy. Ca' mdúngixipy ti tzip. Mïid'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. 15 Ooy cuenditungixp co ni pin cajjpyöydüdiy je pubejtin huidibi Dios ti ahuanïy, jigix nañ jadu'n ni pin ycayajpaadipy janch mät yjot yhuinmañ, e yajhuindigoydäy yajmättäy jacjadyii ymigügtijc, tim jadu'n nej tüg ujtz ta'mbi ypa'mduñ. 16 Ni tüg miich ajcxy ca' huaad ti ayuc mïid'aty mïid huingbi töxyjäy huidibi ca' miich mdöxyijc'adyii. Ca' nañ jadu'n m'ixtijipy je ayuc huidibi Dios yajhuimy mïid miich ajcxy ycixpi, jadu'n nej y'idich Esaú. Mïid tüg caayin uucin Esaú toocnax je huidibi anajty möhuaanip yteedy co y'unggoobity. 17 Miich ajcxy mnejhuïyb co Esaú tocy huidi anajty paatip co japada'ñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yothuimbidiy mïid je' ycixpi tiibi anajty tuñ.

18 Ca' miich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidzucy yjidity etz mijpoj mijtigoy ñaxy, ma anajty ooy y'agoodziy anaxy. 19 Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiiygixy. 20 Je' je' anajty ycixpi co anajty ca' mimadägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity

cögäch mïd tzaa o mïd quipyjïpxu'ñ, oy ixypy y'iyujcity.” ²¹ Oy chigïiyñi huïdibi anajty yaj'ïjxp, Moisés ci'm minaan: “Tziyuuybich yam mïd tzig'i'ñ.”

²² Per miich ajcxy jadu'n nipaady nej jihuïy ti mmïhuingoongi xy yi cop huïdibi yxï Sión etz je Dios juugypï ycajp. Je' je' je Jerusalén tzajpjoty ma canaag mil je ángeles ajcxy yöymujccïxy. ²³ Ti miich ajcxy mmïhuingoongi xy ma ti yöymujccïxy je jaccömaaybi jäy huïdibi ajcxy yxï cojaay ma Dios ñecy jiiby tzajpjoty, je huïdibi ajcxy huin'ïb huin-gapxtacp Dios. Ti miich ajcxy mïhuingoongi xy Dios je huïdibi nijuez'ajtp tüg'óciy. Nañ jadu'n ti miich ajcxy mïhuingoongi xy je' ajcxy je oyjäydïc y'espïritu huïdibi Dios ti yaj'ahuimbijttäy tudägy. ²⁴ Miich ajcxy ti mïhuingoñ yi Jesús, yi huïdibi xycodinaayim ma Dios mïd je jemybi cötujcin huïdibi Dios yajhu'my mïd ïch ajt ycïxpi. Yi Jesús huïdibi mic'ajtmoy je Dios y'ayuc jemybi, co ñi'py teemy yojcy mïd ajt nbocy ycïxpi. Yi Jesús co ci'm ñi'py teemy yojcy mïd jäy ajcxy ypocy ycïxpi, ñigi oy yi' ca'ydi co Abel iyujc ñi'py teemy yojcy mïd ypocy ycïxpi.

²⁵ Paady ycïxp ooy cuenditungix miich ajcxy, ca'ydi yaj'ixtij Dios, je pin ti xyajmïhuimim jemybi y'ayuc. Je jäy ajcxy huïdibi tzïnay jecy'ajty, ca'p je' ajcxy chocy co ajcxy ixtij Dios co jecy'ajty yjamïgapxi ajcxy ya naaxhuiñ. O'ctïy ïch ajt ca'ndzoocim, pen nmooyim ajt njïx je Dios, je pin y'ayuc xyajmïhuimim huïdi tzoön tzajpjoty.

²⁶ Co Dios y'ayuc yejcy jecy'ajty, chi yajtziyuuy ooy naax. Jadachambi Dios

ymina'ñ: “Jadügteçypajc nyajtziyuya'ñich je naax, e ca' nmīnaanīm naaxti'ajty, nañ jadu'n nyajtziyuya'ñich je tzajp.” ²⁷ Co jadu'n Dios ymina'ñ: “Jadügteçypajc nyajtziyuya'ñich je naax.” Hue' yajhuinjihuïy co ytigoydāhuiipy huïdijaty yūcxp huïdibi Dios yaj'oyñy, e je' hui'mīp je huïdijaty ca' yu'cxy. ²⁸ Paady je Jesucristo ycōtujcīn huïdibi Dios xyajmīhui'mīm, ca' yī' huaad ytigoy. Tzoc yajnaxīm Dioscojuyip mīd Jesús y'ayuc ycīxpi, e nyajmī'ajtim n'ojadajtim Dios mīd tudāgy'ajt etz mīd huindzīgī'ñ nej je' jāygidāgyīn. ²⁹ ñich ajt nDios jadu'n yī' nej tūg jīn huïdibi nōctaayb tūg'óciy.

13

Nej jēbi nyajjāygi daacīm Dios

¹ Miich ajcxy huïdibi mībijcp Jesucristo, ca' mjāydigooygixy co ajcxy mnaychójcīgixipy miñ xyipy nej jihuïy ajcxy mdūgquēxyity. ² Ca' ajcxy mjāydigóoygixipy co oyjāy'ajtin mdūngixipy mīd pīnjaty ajcxy xycojādñyb. Mīd co oyjāy'ajtin ajcxy tuuñ, chi nijējity ajcxy yajjāttacy ángeles ajcxy, ni ca' ajcxy huinjihuïy co ángeles anajty ti yajjāttaaccixy.

³ Mjāymedzip ajcxy pīnjaty tzumy'iñāayb mach'iñāayb jadu'n nej jihuïy miich ajcxy nañ jadu'n mdzumy'iñāaygixy mmach'iñāaygixy quipxy mīd je' ajcxy. Jāymedzip miich ajcxy pīnjaty tzaachypi ayo'n minajxp yajnaxp, com nañ jadu'n miich ajcxy mīdity je ninīcx huïdibi jēbi y'ayoy.

4 Huen nidüg'óciy jäy huindzigiiygixy yajmij'ajtcixy je pijcin casada'ajtin. Huen je yëydijc etz je ytöxyijc naymüdtzináayigixy yajxon, com Dios yi' tzaachytunipy pinjaty tundigooyb müid huingbi töxyjäy.

5 Ca' m'adzojccixy meen. Mijotcujc'ajtcixy ti ajcxy ii müid. Dios ti je' ymina'n: "Camina xii ich müich ajcxy n'ixmadzipy, ni ich müich ajcxy ngajäydigoyipy." 6 Jadu'n jëbi nminaanim agujc jotcujc: "Yi Huindzin Dios yi' xypubejtpich, ca' ndzigihua'nich jäy nej xyjatuna'nich."

7 Jäymejtzicx müich ajcxy je pinjaty ti xyñigohuajc'ajtcixy, je pinjaty ti xyajmüdmïydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy müidity ymibjcin.

8 Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixii huinitempo, ca' yi' yajtigadzip yi yhuinma'n ni mina. 9 Ca' müich ajcxy myajhuin'üngixy müid canaag ixpijcin huidibi ca' ytügnaxity müid Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcin xyjihuiyim, nej yi' may'ajt tuñ müid ich ajt. Ca' mbidaacim mhuinma'n ma je cötujcin huidibi adujcp nijëjity caayin uucin. Ni ti jotcujc'ajt ajcxy capaty pinjaty panixp yi jadu'mbi cötujcin.

10 Je judío tungmüdpï huidibi huindzigi'n tumb anajty ma Dios yhuittijc je jecyip, ca' yi' jëbi yjactuuni ma ich ajt nmibjcin jadu'n nej Jesucristo tuñ huindzigi'n müid ich ajt ycixpi. 11 Je judío mïjtungmüdpï ma Dios ytiyc ypidac iyujc

ñi'py ma je Lugar Santísimo nej tüg huindzigi'ñ huídibi yajpocyñihuaatzp je mayjäy. Je iyujc ögy ñinicx jiguem je' yajnögy, ca' jilbyity cajpjoty ma je Dios anajty huindzigi'gyixy. ¹² Tim jadu'n nej je judío sacerdote yajnögy je huindzigi'ñ iyujc ñinicx cajp nínaxy, nañ tim jadu'n Jesús paty tzaachy'o'cin cajp nínaxy jigix mñid je' yci'mni'py pocyñihüadzíp je mayjäy. ¹³ Tzoc mijpidaacim je Jesús tibi y'ögy cajp nínaxy mñid ich ajt nbocy ycixpi. Tzoc minajxim yajnajxim je canayyajmij'adii je canay'ixa'nii, tim jadu'n nej Jesús minajx yajnajx je canayyajmij'adii je canay'ixa'nii. ¹⁴ Ya naaxhuiñ ca' ya ajt nmüdíty tüg ciudad ma jëbi n'ijtim huinixii huinitempo, je' ich ajt nijp'ijxim je tzinaayin huídibi mümb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixii mñid Jesucristo yxii. Co jadu'n n'ojadajtim nmibijctzoohuim Dios jadu'n nipaady nej tüg huindzigi'ñ nmooyim. Tzoc ii mibijctzoohuim, tzoc ojadajtim mñid ajt ngi'm'ahuac ngi'm'ayuc. ¹⁶ Ca' mjäydigóoygixipy co oybi mdúngixipy etz naybubéjtigix naybudigíyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejcixy ma Dios huídibi yi' ooy jäygidägy.

¹⁷ Capxymidoogix pinjaty xyñigohuajc'ájtci xp etz yajmij'ajtcixp, com yi' müich ajcxy xycuend'ajtip yi' m'alma. Nejhuüyim co ciyegaangixy ycuendi ma Dios nej ajcxy ti xycuend'aty. Pen oybi mich ajcxy mdumyb mñid yi' ajcxy, jotcujc ajcxy ñayjihühuyb. Pen jibic müich ajcxy mduñ mñid yi' ajcxy, tajip mayip ajcxy. E pen yi' ajcxy

tajp maayb, chi miich ajcxy ca' ni ti jotcuje'ajt mmïd'adipy.

18 Mibijctzoogix Dios mïd ïch ycixpi etz je pinjaty xymïdhuïdijtpich. Jatytm naymic'ïjxibich tudägy nduunïch ma tüg'óciy ïch ndung, paady ycixp jotcuje nayjihuiyijich. 19 May'ajt nbijctzooybich ma miich ajcxy co Dios mmïbijctzoogix mïd ïch ycixpi, jigix Dios a'ixihuiy co nïcxibich tzojc ma miich ajcxy.

Oy'ajt etz capxpooxin huïdibi cogixïyñip je necy

20 Dios nmïbijctzooybich mïd miich ajcxy ycixpi. Je Dios huïdibi yajjugypijc jadüg'oc ïch ajt nHuindzin Jesucristo co y'o'cy, je huïdibi cuend'ajtp je maymïbijcpïdijc. Co Jesucristo ñi'py teemy yojcy, chi mic'ajt moy je jemybi cõtujcïn huïdibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymïbijcpïdijc. Jadu'n yi' nipaady nej tüg cöbixy cuend'ajtpi huïdibi cuend'ajtp may ngöbixy. 21 Je Dios huïdibi xyajjotcuje'ajtm je' huen xyaj'ahuimbijtcixy huädz etz oyjäy ma tüg'óciy ajcxy mmïbijcïn etz ma tüg'óciy ajcxy mdzinaayïn, jigix ajcxy mdunipy nej yi' tzocy. Dios huen tuñ ma ïch ajt njot nhuinma'ñ mïd Cristo ymic'ajt nej yi' tzocy. ¡Huen Cristo y'idipy mij cömay huinixï huinitempo! Amén. Jadu'n jada.

22 Nmïgügtijc, nbijctzooybich may'ajt yajtungixy mecxtujcïn ma jada ayuc capxhuijïn. Ti ajcxy ii con nijayïygixy. 23 Nejhuïygix miich ajcxy co ajt nmïgüg Timoteo y'ity ahuätztuum. Pen tzojc yjädy

ya ma nyajpaadyich, chi yi' xymiidnícxibich co ñich anajty miich ajcxy nícxy n'ijxcíxy.

²⁴ Nguejxpyich ngapxpoocxin ma nidüg'óciy pin ajcxy xyñigohuajc'ajtp etz je migügtijc ajcxy huídibi mibijccíxyp. Je migügtijc huídibi ajcxy yajpatp ya Italia yquejxyp ajcxy capxpoocxin ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 21 Feb 2024 from source files
dated 29 Jan 2022

4190de74-18ab-52cf-ba4e-5f99ab05892f